

**Kodeks  
ponašanja vijećnika u Gradskom vijeću Tuzla  
(neslužbeni prečišćeni tekst<sup>1</sup>)**

**I OPĆE ODREDBE**

**Član 1.  
*Definicija vijećnika***

U smislu ovog Kodeksa, termin vijećnik označava neposredno izabranog predstavnika građana koji ima mandat dobiven na lokalnih izborima, neposrednim i tajnim glasanjem od strane birača s pravom glasa i koji je kao takav utvrđen i dodijeljen aktom nadležnog tijela za provođenje izbora u skladu sa Zakonom.

**Član 2.  
*Ciljevi Kodeksa***

Ciljevi ovog Kodeksa su preciziranje standarda ponašanja koji se očekuju od vijećnika u obavljanju njihovih dužnosti, jačanje povjerenja, unapređenje osobnog i političkog integriteta, podizanje autoriteta Gradskog vijeća Tuzla i informiranje građana o standardima ponašanja koje oni imaju pravo da očekuju od vijećnika, kao svojih izabranih predstavnika.

**Član 3.  
*Područje primjene***

Ovaj se Kodeks odnosi na vijećnike Gradskog vijeća Tuzla.

Principi ponašanja ustanovljeni ovim Kodeksom, primjenjivat će se na sjednicama Gradskog vijeća Tuzla, sjednicama njegovih radnih tijela, kao i u drugim prilikama koje tretira ovaj Kodeks.

**II STANDARDI PONAŠANJA VIJEĆNIKA**

**Član 4.  
*Primat zakona i općeg interesa***

Vijećnici su dužni da obavljaju svoju funkciju u skladu sa Ustavom, Zakonom i važećim propisima.

Vijećnici će u svom djelovanju uvijek postupati u skladu s općim interesom koji isključuje rad za finansijsku dobit ili bilo koju direktnu ili indirektnu novčanu korist za sebe ili lica iz svog privatnog okruženja, izuzev naknada za svoj rad utvrđenih odlukama Gradskog vijeća ili zaključcima radnog tijela Gradskog vijeća.

Vijećnici će se posebno suzdržavati od svih aktivnosti koje bi trebalo da rezultiraju izborom, imenovanjem ili postavljanjem lica na određene pozicije, a da se pri tome ne provode propisi, ne obezbijedi postupak otvorene javne konkurencije, nezavisne provjere i poštovanja principa kvaliteta, profesionalnosti, znanja i sposobnosti.

---

<sup>1</sup> Ovaj neslužbeni prečišćeni tekst sadrži tekst Kodeksa ponašanja vijećnika u Općinskom vijeću Tuzla („Službeni glasnik Općine Tuzla“, broj 3/12.), tekst Odluke o izmjenama i dopunama Kodeksa ponašanja vijećnika u Općinskom vijeću Tuzla „Službeni glasnik Općine Tuzla“, broj 7/14.) i tekst Odluke o izmjenama Kodeksa ponašanja vijećnika u Općinskom vijeću Tuzla „Službeni glasnik Grada Tuzla“, broj 10/17.)

Neslužbeni prečišćeni tekst se koristi samo za internu upotrebu i na isti se ne može pozivati prilikom službene upotrebe.

## **Član 5.**

### ***Zabrana korupcije***

Vijećnici će se u obavljanju svoje funkcije suzdržavati od bilo kakvog ponašanja koje bi, po važećem domaćem ili međunarodnom krivičnom zakonodavstvu, moglo da se okarakterizira kao aktivno ili pasivno podmićivanje.

## **Član 6.**

### ***Savjesnost i odgovornost u obavljanju funkcije vijećnika***

Vijećnici će svoju funkciju obavljati savjesno, uz otvorenost i spremnost da odgovaraju za svoje odluke, imajući na umu da su izabrani predstavnici svih građana u Gradu Tuzla.

Vijećnici su dužni obučavati se radi svog informisanja, upoznavanja s najvažnijim aspektima sistema lokalne samouprave i ključnim elementima njegovog funkcionisanja, kao i radi kontinuiranog i stručnog usavršavanja za donošenje odluka putem parlamentarne procedure.

Na sjednicama Gradskog vijeća Tuzla i njegovih radnih tijela, vijećnici će se u svemu pridržavati odredbi Poslovnika Gradskog vijeća Tuzla, odnosno poslovnika radnog tijela (komisije ili drugog radnog tijela).

Poštujući propisane obaveze, vijećnici su dužni prisustvovati sjednicama Gradskog vijeća i radnih tijela čiji su članovi. Vijećnici neće napuštati zasjedanje prije završetka a ni tokom trajanja sjednice, a da prije toga ne saopće javno ili predsjedavajućem razlog povremenog ili potpunog napuštanja zasjedanja. Ako su opravdanim razlogom spriječeni da prisustvuju sastancima ili sjednicama na koje su uredno i blagovremeno pozvani, predsjedavajućem će saopćiti te razloge, a on će Gradsko vijeće, tijelo i forum obavijestiti o razlogu izostanka pozvanog vijećnika.

Vijećnici neće bez opravdanog razloga izostajati s javnih manifestacija ili javnih skupova na koje su uredno i blagovremeno pozvani u svojstvu izabranog predstavnika.

## **Član 7.**

### ***Posebna odgovornost u upravljanju resursima***

Vijećnici će sa najvećom pažnjom i osjećanjem sopstvene odgovornosti usmjeravati svoje ponašanje i odluke koje se odnose na finansijska sredstva i upravljanje imovinom Grada, isključivo u skladu s propisima i općim interesom. Svojim ponašanjem neće dati povoda, niti aktivno ili pasivno učestvovati u pripremanju ili podsticati donošenje nezakonitih i nepravilnih odluka koje bi mogle donijeti osobne koristi ili ostvarenja nečijeg privatnog interesa s kojim su povezani finansijskim ili nekim drugim interesom.

## **Član 8.**

### ***Uzajamno poštovanje i uvažavanje***

U međusobnoj komunikaciji i uopće komunikaciji sa javnošću, izabrani predstavnici-vijećnici će u svakom slučaju, uključujući sjednice Gradskog vijeća i njegovih radnih tijela, istupati s uvažavanjem i poštovanjem, izbjegavajući korištenje izraza koji mogu omalovažavati druge ličnosti ili grupe, na taj način poštujući jednaka prava svih uz uvažavanje njihove ličnosti i uvjerenja.

## **Član 9.**

### ***Izbjegavanje sukoba interesa***

Vijećnici su dužni pridržavati se odredaba Zakona o sukobu interesa i drugih zakona koji uređuju nespojivost funkcija izabranog predstavnika sa funkcijom ili položajem u lokalnoj upravi, državnom organu ili preduzećima. Svaki slučaj nastupanja sukoba interesa ili nespojivosti funkcija, izabrani predstavnik-vijećnik će u najkraćem roku prijaviti i odstupiti s pozicije.

Vijećnik će u svakom slučaju tokom vijećanja prijaviti slučaj sukoba interesa, ako se razmatra određeni akt koji treba da bude usvojen i po kome bi on, ili lice iz njegovog privatnog okruženja, ili pravni subjekt u kome ima finansijski ili drugi interes, trebalo da ostvari kakvu korist ili privilegiju protivno Zakonu o sukobu interesa, a prilikom odlučivanja će se izuzeti od izjašnjavanja.

### **III MEĐUSOBNI ODNOSI VIJEĆNIKA I UPOSLENIH U GRADSKOJ UPRAVI**

#### **Član 10.**

#### ***Međusobna saradnja i uvažavanje***

Odnosi između vijećnika i uposlenika u organima uprave Grada Tuzla, zasnivaju se na međusobnoj saradnji i uvažavanju, uz poštovanje Ustava, Zakona i općinskih propisa.

#### **Član 11.**

#### ***Poštovanje uloge zaposlenih u lokalnoj upravi***

U obavljanju svoje funkcije, vijećnici će uvažavati ulogu i odgovornost uposlenika u organima uprave Grada Tuzla, bez predrasuda u pogledu izvršavanja poslova i radnih zadataka koji su im povjereni.

Vijećnici neće zahtijevati od zaposlenih u upravi da preduzimaju, ili da propuste da preduzmu, bilo kakve radnje kojima bi sebi omogućili protivpropisnu direktnu ili indirektnu osobnu prednost, ili dali prednost pojedincima ili grupama pojedinaca, s ciljem ostvarivanja protivpropisne direktne ili indirektno osobne koristi ili u svrhu ostvarivanja političkih ciljeva, onih političkih grupacija kojima pripadaju.

### **IV ODNOSI S MEDIJIMA**

#### **Član 12.**

#### ***Otvorenost i odnosi s medijima***

Vijećnici će u svom djelovanju i u vezi sa svojim odlukama koje donose, uvijek biti otvoreni i niti jednom svojom aktivnošću neće izbjegavati da jasno i javno saopće svoje stavove i razloge za sopstvene odluke i ponašanja.

#### **Član 13.**

#### ***Zakovitost i poštenje u iznošenju informacija***

Prema zahtjevima medija će pošteno i u potpunosti pružati informacije vezane za obavljanje njihovih dužnosti i neće pružiti nijednu informaciju, koja predstavlja službenu, državnu ili vojnu tajnu ili informaciju protivno odredbama Zakona o zaštiti ličnih podataka.

### **V NADZOR NAD PRIMJENOM KODEKSA**

#### **Član 14.**

#### ***Obaveznost poštivanja standarda i principa ovog Kodeksa***

Izabrani vijećnici će se uzajamno podsjećati i pozivati na obaveznost poštovanja principa ponašanja utvrđenih ovim Kodeksom i Poslovníkom Gradskog vijeća.

Predsjedavajući Gradskog vijeća će s najvećom mogućom pažnjom pratiti ostvarivanje principa utvrđenih ovim Kodeksom i bit će ovlašten u svakom momentu upozoriti na obavezu ponašanja u skladu s Poslovníkom Gradskog vijeća i ovim Kodeksom.

#### **Član 15.**

#### ***Svrha sankcioniranja***

Vijećnik koji prekrši neku od odredbi ovog Kodeksa, bit će podvrgnut utvrđivanju odgovornosti, a na način i po postupku propisanom ovim Kodeksom.

Svrha sankcioniranja je osuda neprihvatljivog ponašanja koje je u suprotnosti s ovim Kodeksom, a što ima preventivni moralni uticaj na buduće korektno i odgovorno ponašanje vijećnika, kao i razvijanje društvene odgovornosti.

## **Član 16.** ***Etički odbor***

Sa svrhom osiguranja primjene ovog Kodeksa, Gradsko vijeće formira poseban Odbor za Kodeks ponašanja vijećnika (u daljnjem tekstu: Etički odbor).

Etički odbor prati primjenu Kodeksa, postupa po pojedinačnim prijedlozima za utvrđivanje postojanja povrede Kodeksa, podnosi izvještaj Gradskom vijeću s preporukama i ima druga ovlaštenja utvrđena ovim Kodeksom.

Etički odbor čine po jedan predstavnik svakog od političkih subjekata koji participiraju u Gradskom vijeću ili predstavnik nezavisnih vijećnika u Gradskom vijeću, ako su izabrani shodno Izbornom zakonu i po službenoj dužnosti predsjedavajući Gradskog vijeća Tuzla

U slučaju da je broj članova Etičkog odbora paran, u rad Etičkog odbora će se kooptirati zamjenik predsjedavajućeg Gradskog vijeća

Etički odbor radi bez naknade.

Etički odbor donosi svoj Poslovnik o radu.

Administrativno-tehničke poslove za potrebe Etičkog odbora obavlja Stručna služba Gradskog vijeća.

## **Član 17.** ***Procedura utvrđivanja odgovornosti***

Etički odbor radi po prijavama.

U prijavi će obavezno navesti za koje radnje smatra da predstavljaju povredu Kodeksa i dokaze kojima to potvrđuje.

Etički odbor razmatra prijavu i ovlašten je provesti postupak ispitivanja osnovanosti prijava, provesti potpuni dokazni postupak i nakon toga odlučiti postoji li povreda neke od odredbi Kodeksa.

Ako Etički Odbor zaključi da nije bilo povrede odredaba ovog Kodeksa, o tome će obavijestiti podnositelja prijave.

Ako Etički odbor zaključi da je određeni vijećnik učinio povredu neke od odredbi ovog Kodeksa, Gradskom vijeću Tuzla će podnijeti detaljan izvještaj s preporukom i nacrtom odluke o povredi odredaba ovog Kodeksa.

Gradsko vijeće prihvata ili ne prihvata preporuku Etičkog odbora o povredi odredaba Etičkog kodeksa s izrečenom mjerom.

Ako prihvati preporuku o izricanju mjere za povredu Kodeksa vijećniku, donosi odluku čiji nacrt izrađuje Etički odbor uz pomoć Stručne službe Gradskog vijeća.

## **Član 18.** ***Mjere***

Mjere za povredu odredbi ovog Kodeksa su:

- opomena, i
- javna opomena na sjednici Gradskog vijeća.

## **VI OBJAVLJIVANJE I STUPANJE NA SNAGU**

### **Član 19.**

Svojim aktivnostima izabrani predstavnici-vijećnici će osigurati promociju ovog Kodeksa u javnosti i medijima.

Ovaj Kodeks će se objaviti u „Službenom glasniku Grada Tuzla“ i na web stranici Grada Tuzla: [www.grad.tuzla.ba](http://www.grad.tuzla.ba)

### **Član 20.**

Kodeks stupa na snagu osmog dana od dana objavljanja u „Službenom glasniku Grada Tuzla“.